

KO nga korero tawhito a te Poari kua tu nei mo era tu take, hei te kape o Hanuere ka puta ai. E wha a ratou wharangi motuhake. Ma to ratou Poari e tuku mai nga take hei perehi. Kaore ano he ropu penei te ahua me nga mema o te Poari nei kia whakahuihuia mo enei tu take. Ko nga tino maramatanga enei mo nga take Maore. Titiro iho ki nga ingoa nei, ara ki etahi o nga Mema o taua Poari.

Ko te Minita Maori, ka Ta Maui Pomare, ko Apirana Ngata, ko Takuta Rangihiroa, ka Atirikona Hapata Wiremu, ko Te Peehi, ko Te Kina, ko Tiati Jones te Tiamana, ko Te Raunoa te Hekeretari. Tangohia he kape o *Te Toa Takitini* o Hanuere ma koutou, kia kite ai koutou i nga korero a te Poari whaka-haere i nga take tawhito a nga iwi Maori o nga moutere katoa. E whai mana ana nga Minita katoa ki te tango i o koutou ingoa me nga hereni, a ma ratou e tuku mai.

NGA RETA.

HE PATAI MO TE TURE POARI.

Ki te Etita.

Panuitia atu enei patai:—(1) Kei te tekiona 18 of te Ture Poari Whenua Maori, 1909, ko hea te parekura i mau herehere ai tatou i tenei ture? (2) Kohea hoki te parekura i whaka-rauoratia ai tatou e tenei ture? Ehoa ma he take nui kei roto i enei patai e rua. Tukuna mai a koutou whakautu, me nga whakamarama, kia puta i te pepa. Tena koutou.

—Na K. H. KAMAU,

Tikokino, H.B.

E HIA Nga MATATUA.

Ki te Etita.

Tena koe. Kua kite iho i o whakamarama mo nga mate me nga ora, mo te tinana me te wairua. Kaati. Kia ora koe i te maru of te Ariki.

Kaati. Ehoa e "The Toa Takitini," e rua nga kukupa i tukua e Noa kia haere ki te titiro i te whenua. Kotahi i oti atu, kotahi i hoki mai me te rau Oriwa.

E hoa kei te haere atu ta matou kukupa me te rau oriwa, hei awhina i ta tatau pepa. Panuitia atu enei waahi kupu, hei whakarongo ma te Tai-rawhiti. E te Etita kua tere taku waka, mau e rapu atu kei te Tai-rawhiti ranei, kei te Tai-hauauru ranei. Te ingoa o te waka nei ko Matatua. E rua nga waka kei ahau kei Ngapuhi nei, ko Matatua, ko Toki-mata-whaorua. Kotahi o nga waka kei a Ngati-kahu, ko Mamari. Kaati, kua rongu ahau kei te Tai-rawhiti a Matatua. Na konei ka patai ahau, e hia nga Matatua i te hoenga mai i Hawaiki? Inahoki, kei te Tai-rawhiti tetahi, kei a au nei hoki tetahi, kei te Tai-tokerau nei. Ko te ingoa o te kainga kei reira a Matatua e tau ana ko Takau. Kaati, me penei taku whakamarama, me patai ko wai te tangata kei te Kainga-a-ngaru o te waka, ko wai kei te Taingariu? Ko wai kei te pitau o te kei? Heoi ano.

—Na TUREI HEKE,

Mangamuku.

me ona hoa.

HUI O NGATI POROU KI WAIOMATATINI.

ITU te Hui nui a Ngatiporou ki Waiomatatini i te 26 o Noema nei, kia tutaki ai ratou me a ratou take ki te Minita Maori ara ki a Hon. J. G. Coates. Ko nga take a Ngati Porou i whakatakoto ai ko nga rori o Waiapu, ko te piriti, nga moni reiti e noho nama ana mo Kaiinanga. I whakaritea ma tetahi Komiti o nga taha e rua e whiriwhiri aua reiti, nga mea me horoi noa atu me nga mea e tika ana kia utua.